

## Benedicziun da Nadal

Seigies sco in **aunghel**,  
proclamescha la pasch e meina tier Cristus  
tut tgi che basegna ei.

Seigies sco **Maria**,  
semetta a disposiziun per operar sin quest mund  
en num da Diu.

Seigies era sco **Giusep**  
e schurmegia ils fleivels,  
pertgira cun premura e fideivladad  
tut quei ch'ei sogn.

Seigies sco in **retg**  
ch'ei sentupaus cun Diu,  
e sia veta ha retschiert in niev senn.

Resta sco in **pastur**  
ch'ei alla tscherca da Diu,  
buca emblida tia finamira: La cuminonza cun el.

Aschia daventa Nadal per tei in eveniment  
ch'effectuescha cumpleina benedicziun en tia veta.

A. Wolkinger

## Benedicziun d'ils affons avon la stalla

La fiasta dalla s. famiglia ils 26 da december 2010 festivein nus  
Nadal avon la stalla, en spezial cun affons pigns e gronds, cun  
lur geniturs e confamigliars. Da cuminonza lein selegrar dalla  
nuviala da Nadal: FALERA: 17.00h  
LAAX: 18.00h

## Il plaid

En prinzip stuess jeu scriver cheu in plaid per il temps  
d'Advent. Per quei che Vus vegnis a leger quei plaid per  
l'entschatta dil meins da december. Mo tuttina vi jeu scriver in  
plaid da Nadal, che quella fiasta porschi oravon siu splendor e  
ruaus ellas jamnas vegentas da furtina e hectica.

Il caos dil temps e la malruasseivladad han anflau siu miez el  
plaid 'Nadal'. Igl ei quasi sco tier in ciclon, el center schai il  
grond ruaus. E quei miez resta oz, damaun sco era el futur.  
Mintga eglia da sil calender conferma: Nus dumbrein ils onns  
dapi gl'empren Nadal.

'Nadal' significhescha buca mo pasch, harmonia e famiglia,  
mobein oravontut: Dieus ei cheu!

Nus savein dalla cardientscha: Dieus ei daventaus carstgaun!  
Cheutras parta el il plascher e la miseria, la veta e la  
mortalitad. El parta quei cun Maria e Giusep, culs aunghels e  
pasturs, culs sabis e cun tuts carstgauns da buna voluntad.

Mo tgi che po surstar, che Dieus ei presents, quel che  
sesmarveglier avon il pursepen, quel astga ughegiar ils plaids  
che tunan magari buca propi perschudent, che ston denton  
tuttina vegnir pronunziati: Nadal – Dieus cun nus – El ei  
daventaus carstgaun – nus savein anflar El.

Surlunder astgein, gie stuein nus plidar, denter nus ed en  
nossa societad. Plaids da speranza, da confidanza e plaids da  
benedicziun. “Il vierv ei daventaus carn, ed ei restaus denter  
nus”. Quella zun cumplicada construcziun el lungatg religius,  
explica cuort e bein il messadi da Nadal: Dieus ei denter nus,  
El ei cun nus!

A Vus tuts in grazius temps d'Advent e da Nadal cun  
l'experiencescha: Emmanuel - Dieus cun nus!

Vies sur Peter

## Informaziuns per Laax

### Communiun dils malsauns:

Mesjamna, ils 15-12-2010 suentermiezdi

### Cordial beinvegni allas novas ministrantas ed als novs ministrants

Nus engraziein a vus zun fetg che vus steis a disposiziun per quei bi survetsch. Vus fageis cheutras grond plascher all'entira pleiv. Dieus paghi era als geniturs ch'accumpognan e sustegnan lur affons sin quella via.

*Shania Ardüser, Cedric Brunold, Celine Caduff, Pascal Caduff, Seraina Kälin, Julia Seelig, Laurin Seelig, Curdin Toggenburg, Mauro Toggenburg, Jonas Urscheler.*

### Cordiala gratulaziun alla giubilara ed al giubilar

Ils 06 da december astga *Johann Capaul-Sievi*, ed ils 25 da december festivescha *Karmelia Maissen-Freimann* igl anniversari da 85 onns. Nus giavischein tut il bien, buna sanadad, ed ina biala fiasta el ravugl dalla famiglia.

### Advent cun ils seniors

Dumengia, ils 5 da december 2010 envida l'Uniun da dunnas tut ils seniors alla sentupada d'Advent. Nus fagein a tuts in cordial beinvegni e giavischein in grazius temps d'Advent.

### Christmette (Messa da mesanotg)

Buca pia pleivs han aunc la messa da mesanotg. En moda zun speziala lai quei survetsch nocturn sentir ils plaids da Jesus: "Jeu sun la glisch dil mund." Dieus sco affon el pursepen semuossa sco glisch ella stgiradetgna dil mund.

Sco ils pasturs han fatg guardia dalla notg per lura muntanera, schia ei la vigilanza ina vertid dils cristians. Cordiala invitaziun da festivar quella speziala survetsch divin da Nadal.

## Informaziuns per Falera

### Communiun dils malsauns:

Venderdis, ils 03-12-2010 suentermiezdi

Gievgia, ils 16-12-2010 suentermiezdi

### Cordiala gratulaziun alla giubilara ed al giubilar

Ils 04 da december festivescha *Gion Gieri Cabrin-Blumenthal* ed ils 22 da december astga *Josefina Caderas-Cabrin* festivar igl anniversari da 80 onns. Nus giavischein tut il bien, la benedicziun dil Tutpussent, buna sanadad ed in bi di da fiasta.

### Cordial beinvegni alla nova ministranta ed als novs ministrants

Nus engraziein a vus zun fetg che vus steis a disposiziun per quei bi survetsch. Vus fageis cheutras grond plascher all'entira pleiv. Dieus paghi era als geniturs ch'accumpognan e sustegnan lur affons sin quella via.

*Viviane Wellinger, Jan Casutt e Joel Cabalzar.*

### Fiasta da nozzas

Ils 18 da december festiveschan *Carmen Summer e Curdin Conrad* lur nozzas en baselgia parochiala. Nus giavischein als nozzadurs bia ventira e buna convivenza ella veta matrimoniala.

### Survetsch divin dil plaid la vigelgia da Nadal

Entras il giug da Nadal dils affons dat quei survetsch divin ina atmosfera fetg famigliara. Dieus paghi a tut ils responsabels per lur engaschi, oravontut als affons e luras scolastas e scolasts, alla grupp da musicants sco era al Cussegl pastoral. In grond engraziament per quell survetsch festiv.

